

**Selma ISIĆ**

*Društvo arhivskih zaposlenika Tuzlanskog kantona*

*JU Arhiv Tuzlanskog kantona*

*selmaistic@yahoo.com*

UDK/UDC: 930.25(497.6 Tuzla)"2024" (047)

## **Izveštaj sa Međunarodne arhivske konferencije “5. TUZLANSKI ARHIVSKI DANI”, Tuzla, 27. i 28. septembar 2024. godine**

### **Conference Report from the International Archives Conference “5. TUZLANSKI ARHIVSKI DANI”, Tuzla, September 27 and 28, 2024.**

U organizaciji Društva arhivskih zaposlenika Tuzlanskog kantona, 27. i 28. septembra 2024. godine, u Hotelu “Salis” u Tuzli održana je Međunarodna arhivska konferencija “5. Tuzlanski arhivski dani”.<sup>1</sup> Konferencija je, kao i ranije, privukla izlagače iz različitih zemalja, uključujući Sloveniju, Hrvatsku, Crnu Goru i Bosnu i Hercegovinu, stvarajući tako preduslov za razmjenu znanja i iskustava, kao i usavršavanje u arhivskoj djelatnosti. U fokusu interesovanja Konferencije bila je tema: *Arhivske zbirke sa podtemama: zakonski aspekti, prikupljanje i preuzimanje arhivskih zbirki, formiranje arhivskih zbirki u arhivima, lične i porodične zbirke, značaj arhivskih zbirki za istraživanja.*

Učešće u skupu su pored arhivskih radnika iz Bosne i Hercegovine uzeli i stručnjaci iz Slovenije, Hrvatske i Srbije.

U ime Društva arhivskih zaposlenika Tuzlanskog kantona okupljenima se obratila predsjednica Organizacionog odbora Konferencije, Hatidža Fetahagić. Učesnike skupa pozdravili su i dr. Vlatka Lemić u ime ICARUS-a Hrvatske, dr. Zdenka Semlić Rajh u ime Zgodovinskog arhiva Ljubljana i Univerziteta Alma



<sup>1</sup> Informacije o održanoj Konferenciji možete naći na linku: <https://daztk.net/2024/10/23/odrzana-konferencija-5-tuzlanski-arhivski-dani/>

Mater Europaea, dr. Miroslav Novak, u ime Arhivskog društva Slovenije i Pokrajinskog arhiva Maribor, Lela Pavlović u ime Društva arhivskog radnika Srbije, Sejdalija Gušić u ime Arhivističkog udruženja Bosne i Hercegovine i Arhivističkog udruženja u Federaciji BiH i Dušan Popović u ime Udruženja arhivskih radnika Republike Srpske.

Pored konferencijskog dijela, posjetitelji su imali priliku prisustvovati promociji časopisa “Arhivski pogledi” br. 4<sup>2</sup>, godišnjaka koji publikuje Društvo arhivskih zaposlenika Tuzlanskog kantona. Isti prati konferenciju „Tuzlanski arhivski dani“, a namijenjen je podizanju svijesti i edukaciji, te ističe važnost razvoja arhivistike i arhivske djelatnosti kao nauke u Bosni i Hercegovini. Časopis posebnu pažnju posvećuje podizanju nivoa stručnog znanja i kompetentnosti lica koja rade na planu zaštite arhivske građe kao nezamjenljive pisane kulturno-historijske baštine. Osnovni cilj pokretanja časopisa je



Prilog 2. Promocija časopisa “Arhivski pogledi”, br. 4.

proučavanje i istraživanje pitanja i tema iz „moderne“ arhivistike. Promotori časopisa bili su doc. dr. Vlatka Lemić i prof. dr. Sead Selimović.

U okviru konferencije prisutni su imali priliku uživati u interesantnoj i posebnoj izložbi pod nazivom „Ljubav ide kroz stomak – kulinarka u arhivskim izvorima“ koju su pripremile kolege iz Zgodovinskog arhiva Ljubljana. Neobična izložba uključuje kombinovane elemente stripa i arhivskih izvora koji pričaju priču o arhivu, zanimljivim kuharskim receptima i ljubavi. Arhivi su prave male riznice podataka koji u svojoj građi kriju razne zanimljivosti iz života običnog malog čovjeka. Jedna takva tema kulinarstva i kuharskih recepata pronađenih u arhivskim izvorima predstavljena je u navedenoj izložbi.<sup>3</sup> O izložbi „Ljubav ide kroz stomak – kulinarka u arhivskim izvorima“ govorila je dr. Zdenka Semlić Rajh.

<sup>2</sup> Elektronska verzija časopisa dostupna na linku: <https://arhivskipogledi.daztk.net/arhivski-pogledi-4-archival-views-no-4/>.

<sup>3</sup> Više o izložbi “Ljubav ide kroz stomak” možete vidjeti na: <https://www.zal-lj.si/ljubezen-gre-skozi-zelodec/>.

U radnom dijelu Konferencije, 28. septembra 2024. godine održane su dvije sesije. Izlagači su predstavljali svoja iskustva i perspektive, iznoseći različite probleme, ali i donoseći različite ideje i rješenja o pitanjima koja se tiču praksi u tretiranju arhivskih zbirki.

U okviru I sesije predstavljena su slijedeća izlaganja:

- **Izv. prof. dr. Zdenka Semlič Rajh** (Zgodovinski arhiv Ljubljana, Slovenija): *Arhivske zbirke u teoriji i praksi: pro i contra*,
- **Doc. dr. Vlatka Lemić** (ICARUS Hrvatska, Sveučilište u Zagrebu, Hrvatska): *Znanstveni arhivi i akademska tradicija u Hrvatskoj iz perspektive stoljetnih arhivskih i baštinskih zbirki Sveučilišta u Zagrebu*,
- **Dr. sc. Jasmina Živković** (Istorijski arhiv Požarevac, Srbija): *Arhivske zbirke i elektronska arhivska građa*,
- **Slobodanka Cvetković i Nataša Milošević Dulić** (Istorijski arhiv Požarevac, Srbija): *Zbirke Istorijskog arhiva Požarevac – priprema i izrada vodiča*,
- **Izv. prof. dr. Miroslav Novak** (Pokrajinski arhiv Maribor, Slovenija): *Informacijska sigurnost i procesi arhivskog (stručnog) rada*.



Prilog 3. Učesnici konferencije "5. Tuzlanski arhivski dani".

U okviru II sesije predstavljena su izlaganja:

- **Dr. sc. Koraljka Kuzman Šlogar** (Institut za etnologiju i folkloristiku, Hrvatska): *Predstavljanje rada Instituta za etnologiju i folkloristiku Zagreb*,

- **Mr. Jasmin Jajčević** (Arhiv Tuzlanskog kantona, BiH): *Arhivske zbirke u funkciji izložbene djelatnosti Arhiva Tuzlanskog kantona,*
- **Natali Veličković i Nataša Radenković** (Istorijski arhiv Niš, Srbija): *Vremeplov kroz zbirku pozivnica Istorijskog arhiva Niš,*
- **Amel Redžić i Kinana Felić** (JU Arhiv Unsko-sanskog kantona Bihać, BiH): *Zbirka matičnih knjiga u Arhivu Unsko-sanskog kantona Bihać,*
- **Mr. sc. Esaf Lević, Zagorka Ostojić, Nedim Hadžić** (Služba za arhiv Brčko distrikta, BiH): *Digitalni fond 'Alijaga Kučukalić i sinovi',*
- **Snežana Radović** (Istorijski arhiv Niš, Srbija): *Niška Banja: da li je radioaktivna topla voda? Lični fond inženjera Vladislava Cvetanovića (1883-1962).*

Različiti aspekti rada sa arhivskim zbirkama i problematiziranje raznih pitanja u oblasti zakonske regulative, preuzimanja, formiranja i organizacije istih bila je tema koja je pobudila veliko zanimanje i otvorila nekoliko bitnih i aktuelnih pitanja za arhivsku struku. Učesnici su zaključili da iako su arhivske zbirke jedna od osnovnih i najstarijih pitanja arhivske struke, o istima nije ni približno sve rečeno, naprotiv struka je svjesna nepoznanica, neujednačenih praksi i različitih iskustava što je dovelo da se o istom razvila konstruktivna diskusija. U diskusiju o temi su se uključili: Zdenka Semlič Rajh, Miroslav Novak, Vlatka Lemić, Slobodanka Cvetković, Jasmina Živković, Omer Zulić, Sejdalija Gušić i drugi.



Prilog 4. Zajednička fotografija učesnika konferencije  
“5. Tuzlanski arhivski dani”.

Po svršetku prisutne je još jednom pozdravila i zahvalila im na učešću Hatidža Fetahagić, predsjednica Organizacionog odbora Konferencije “5. Tuzlanski arhivski dani”. Sumirala je zbivanja sa stručnog skupa i pozvala učesnike da i naredne godine uzmu učešće u Konferenciji.

Konferenciju su u 2024. godini finansijski podržali Federalno ministarstvo obrazovanja i nauke Mostar i Ministarstvo kulture, sporta i mladih Tuzlanskog kantona.

Konferencija je bila i medijski dobro praćena kroz najave i vijesti o održavanju iste, te video priloge i emisije. Informacije o istim mogu se naći na nekoliko portala u tuzlanskoj regiji<sup>4</sup> i okruženju<sup>5</sup>, kao i u video priložima snimljenim i emitovanim na lokalnim televizijskim kućama RTV TK i RTV7.<sup>6</sup>

U konačnici, "5. Tuzlanski arhivski dani" predstavljaju značajan korak ka boljem razumijevanju pitanja i nedoumica vezanih za formiranje i organizovanje arhivske zbirke i pokušaju ka ujednačavanju različitih praksi u radu sa arhivskim zbirkama. Konferencija je pridonijela povezivanju arhivskih profesionalaca iz različitih zemalja, potičući razmjenu ideja i zajedničko suočavanje sa izazovima arhivske teorije i prakse. Očuvanje pisanog kulturnog naslijeđa i kulturno-historijske baštine kroz stalnu brigu o arhivskoj građi i infomacijama koje nosi, kao i prezentovanju iste ostaje ključna misija arhivske zajednice.

---

<sup>4</sup> <https://tuzlainfo.ba/index.php/najava-dogadaja-2/item/250878-sutra-pocinju-5-tuzlanski-arhivski-dani/>; <https://boljatuzla.ba/5-tuzlanski-arhivski-dani/>.

<sup>5</sup> <https://arhivisticodrustvosrbije.org.rs/index.php/375-5-uzl-ns-i-rhivs-i-d-ni>;  
[https://arhivisticodrustvosrbije.org.rs/images/Program\\_5\\_TAD\\_Tuzla\\_2024.pdf](https://arhivisticodrustvosrbije.org.rs/images/Program_5_TAD_Tuzla_2024.pdf).

<sup>6</sup> [https://www.youtube.com/watch?v=F8TqmW8tTDE&ab\\_channel=RTV7Tuzla](https://www.youtube.com/watch?v=F8TqmW8tTDE&ab_channel=RTV7Tuzla);  
<https://rtvtk.ba/odrzana-5-medjunarodna-konferencija-tuzlanski-arhivski-dani/>.